

HEBREOS

Ra sɔcua bi 'benba yu 'yɛc'yɛi, yu israel, ngue na ya ra hebreo u

Bin 'yuse Oja nangue'a rá Ts'unt'u

1 Nu'bu maya'bu thoho 'dahmi ts'u bu í 'yu'a rán 'yomfɛni Oja, ne 'dahma 'dan'yo bu á xi'u yú pɔngahya. Ne gue'u bi xi a mam bombɔtahɔ u, gue dyu israelhɔ. ²Pe nuya rán zegui yu pa ya, bi jaju ga pɔhmbu xun ho Oja ya nangue rá Ts'unt'u bi zɔcua dí 'buhmbu. Ne guese a rá Ts'unt'u í 'yɔt' Oja gátho yu ximhäi, ne bi zänni dim Hmu 'be'a gátho i ja. ³Ne ní 'yɛpɔ bí 'bu Oja rá Ts'unt'u tengu'bu rá thai ra hyadi, gue'a di jaju ga pɔhmbu a rán ho Oja. Ne tengu 'bu ra sello, 'da angu da bɔni. Ne di 'yonse 'be'a gátho i ja a rá Ts'unt'u Oja, nangue rá m hma i ja rá ts'edi. Ne nu'bu mí juase bi hoga ma ts'oquihu ua, bi mbeng bu mahɛts'i 'darpɔ ní mandauí a tate thoho i ja rá ts'edi.

Man'da i ja rá ts'edi rá Ts'unt'u Oja xinda gue'u yúm 'behni mahɛts'i

⁴Nu rá Ts'unt'u Oja 'bu ya xí hogahɔ, bin t'un rá ts'edi xun ho xinda gue'u yúm 'behni mahɛts'i. Nguetho ya rá Ts'unt'u zehɛ Oja a, i

conhui rá ts'edi rá Ta xinda gue'u yúm 'behni. ⁵Nguetho:

Nu'í ma 'dats'unt'u i,
dí 'da a ni ts'edi ya,
pe njam'bu bi t'ɛmp'u yúm 'behni Oja, pe hinda hɔnt'a rá Ts'unt'u zehɛ. Ne:

Nugä dra Ta nangue ma Ts'unt'u, ne xinga n'da rá m 'behni Oja bi 'yɛmbi. ⁶Pe nu Oja 'bu mambá si ua ja ra ximhäi a rá Ts'unt'u, ne bi 'yɛna:

Nu ahɔ gyɔm 'behnihɔ mahɛts'i,
gátho gui thandehɔ na ma Ts'unt'u,

bi 'yɛn Oja. Nguetho nu'a rá Ts'unt'u go da t'ɛspa a bu na nu Oja. ⁷Pe nu yúm 'behni mahɛts'i, i ɔt' Oja yú 'yɛhɛ thoho u, tengu mán t'o't'i:

ɛmme i tih yúm 'behni 'bu i ɔrpa rá 'befi tengu 'bu yun dahi,

ne di juadi 'be'a gátho hingui numanho Oja tengu 'bu ya sibi, nangue rá ts'edi zehɛ Oja.

⁸Pe gue bi 'yɛmp'a rá Ts'unt'u Oja: Nu'í gra Oja, thocpa thoho gam manda zehɛ mazai,

njam'bu dim 'beh ni ts'edi, ne
guidí manda xun ho.

⁹Ne bi 'yembi:

Nu'i gra Oja, emme guí numanho
a ran ho, ne 'be xingui
ts'u guí nde gui nu a ran ts'o.
Janangue'a ni Ojagui man'da dá
'da'a ran johya
xinda gue'u gátho mi'da ni cu
gue ma 'yεc'yei,

bi 'yembi. ¹⁰Ne bi 'yemp'a rá

Ts'unt'u a Oja:

Nu'i gra Hmu, rá mbudi gá 'yot'
ra ximhäi,
ne gá 'yøzehe 'be'a Gä bí ja
mahεts'i,

bi 'yεn Oja.

¹¹Ne nu'a ra ximhäi dim pädi, ne
mahεts'i, pe nu'i gam 'bui
mazai.

Gátho yu din ts'oni tengu'bu yu
'yahe.

¹²Ne tengu'bu di päh ní he n'da,
din jabu 'bu gá päh ra ximhäi.
Pe nu'i njam'bu gam pädi gátho

yu pa,

ne njam'bu da gua'a ni te.

¹³Ne, dami manda ua ja ma ts'edi
ui,

ja gue'bu ga ja i gui tap'u gátho
man suihu,

bi 'yemp'a rá Ts'unt'u a Oja. Pe
njam'bu bi xi u yúm 'behni Oja
tengu a. ¹⁴Gátho yúm 'behni bí
penhua, tengu'bu yun dahi gue hin
dí nuhu, i ot' yá 'yεhe Oja nangueju
to'o gátho nts'anni da hyan a ra te
njam'bu da guadi.

**Jatho ga urpahu ra güenda
a ní yanju Oja**

2 Pe nu'a rá Ts'unt'u Oja bi
'yurcahu rá 'yu Oja, xinda

gue u 'be'a mí hma maya'bu.

Janangue'a man'da emme
jats'edithe ga jamansuhu a 'be'a dí
øhmbu ya, n'dahma hin ga 'behmbu
a, ne xín dam 'behmbu buya.

²Nu'bu mí man'u yúm 'behni Oja u
yún t'edi Oja maya'bu, pe guehma
bi nu ran unbi a rán säui a to bi
mbesta a bi ma. Pe nu'a rá m hma
Oja bi man'a rá Ts'unt'u, man'da
ja rá ts'edi a. ³Janangue 'be xingui
ts'u ga ponju 'bu hin dí urpahu ra
güenda a rá m hma mixte thoho. Ne
gue'a ram hma ní yanju Oja a. Ne
rá mbudi bi manse ra Hmu 'bu mim
'bucua ja ra ximhäi. Ne m'bejua bi
xiju u yá xädi gue bi 'yø a bi man
ra Hmu. ⁴Ne'a Oja bi 'yudi majuani
a ram hma 'bu mí 'yot' yu hmepya
ne xun ngu yun t'ot'e mixte.
Ne'bu mí 'daju ra ts'edi nangue rá
Hogandahi, tengu mí ndese Oja bi
darcahu. Ne gue'a í 'yudi majuani a
ram hma.

**Nu ra Jesús njuantho bin
ja tengu thohogahu**

⁵Pe nuna rá ts'edi Oja gue dí mangä,
hinga nan ja xun ho. Pe hinga gue'u
yúm 'behni mahεts'i di jap Oja di
manda bu ja ra 'da'yo ximhäi 'bu bin
ja rá ts'edi Oja xun ho bu. ⁶Pegue bi
zän Oja to'o di manda bu, tengu bi si'a
Oja 'bu mí t'anni 'be'a di 'yεt'ui yu ja'i:

'Be'a gue ε dí pehmbe gue emme
guím bεnje,
ne dyu ja'i thohohe. Ne man'da
guidí jamansuje.

⁷Pe ja 'da yu pa gá jaje him mí ja
ma ts'edihe, xinda gue'u nim
'behni bu mahεts'i.

Pegue gá sänni gui 'yεscahe, ne
gui 'dac ma ts'edihe.

Ne gá sänni ga mandahe 'be'a gátho i 'bui ne 'be'a gátho i ja gue gá 'yøt'e.

⁸Ne gátho gá sän'ndu mi'da 'be'a gá gá 'yøt'e gue da 'yɛc'yeigahe,

bi 'yɛm bu mán t'o't'i. Janangue'a hin'yü 'be'a bi zänni gue hin ga mandahü, nguetho bi 'yɛna: “Gátho da t'ɛc'yei u yu ja'i.” Pe hindaná nuhü gue gátho da 'yɛc'yeigahü. ⁹Pe hinda hønt'a ra Jesús, bin ja tengu mán t'o't'i, bi t'ɛspa 'bu mí du, bin t'un rá ts'edi. Pegue xín ja 'da yu pa bin japi him mí ja rá ts'edi xinda gue'u yúm 'behni Oja mahɛts'i. Janangue'a bi zä bi du nangue n'da ngu n'dajü, nangue rán hugcate Oja. Ne nu'a ran ɔte bi nu, gue'a í t'ɛspa a. ¹⁰Nu Oja bi zän'ndu gátho da hyonse. Ne bi nde bá si xun ngu yú t'uhni bu ja rá ts'edi. Janangue'a xun ho a bi 'yøt' Oja gue bin unba u yú Hmu, guepu bi zä bi yanju xun ho. ¹¹Ne nu'a ra hocpate ne'u to'o mahoqui, ne n'dat'a yu Ta. Janangue'a hingui pe'ts' rá sä a ra hocpate da 'yɛmbi yú cu u bi hoqui. ¹²Tengu mán t'o't'i, bi 'yɛna:

Ga xi u ma cu gátho nangue'e, ne ga ɛs'i'i nubü ja rám peti ma cu,

bi 'yɛn'a ra Cristo. ¹³Ne man'da bi man ra Cristo:

Dí tø'mi da mbäxcä Oja.

Ne xø bi 'yɛna:

Dí 'bähmbe ua ya yú t'uhni Oja bi 'daqui,

bi 'yɛn'a ra Cristo. ¹⁴Nuju yú t'uhnigahü a, dyu ja'i thohohü, ngue i ja ma ngøhü ne ja ma jihü. Ne a ra Jesús bin ja'i ne bin ja rá ngøc'yei tengu thoho gahü.

Janangue'a bi zä bi du ngue í 'berpa rá ts'edi a rá hmu ran ɔte, ngue ra zithu. ¹⁵Ne guepu da zä di 'uecpa yú mbidi u to'o i su ran ɔte gátho yu pa i 'bui. ¹⁶Ne mfädi hinga gue'u yúm 'behni Oja mahɛts'i bi 'yørpa ra güenda da yäni, pegue guenju dyu 'yɛc'yeihü yúm bom'betoju ra Abraham, nde Oja da yanju.

¹⁷Janangue'a nu ra Jesús njuan̄tho bin ja tengu thoho gahü, bi be'ni 'be'a gátho dí m̄mhbu, bi zä 'be'a gátho dí sähü. Nu'bu hin xtín jabü, hin xtán zä xtí huggahü, hin xtán zä xtí juah rá 'befi Oja gue bi hoga ma ts'oquihü. Gue'a í t'ɛmbi bim hmumbäjä a. ¹⁸Ne nuya da zä da mbäcaxü to'o i ts'ä nangue yun unbi, nguetho nese a bi ts'ä nangue yun unbi, ne bi hyät'i.

Nu ra Jesús man'da sä da t'ɛspi xinda gue'a ra Moisés

3 Nuya, ma hoga cu ahü, gue bi huan'nahü 'darpü dam 'bühmbü bu mahɛts'i a Oja. Dami 'yøhmbü ya nangue ra Jesús, nu'a ra pøngahyá ne ra hocpate nangue rá 'yu Oja dí tenhdü. ²Nu ra Jesús bi juah rá 'befi bi un'na Oja, tengutho ra Moisés bi juah rá 'befi gue bi jamansu u n'dam'bui yú t'uhni Oja. ³Pe nu ra Jesús man'da sä da t'ɛspi xinda gue'a ra Moisés, tengu thoho ra ta bu ja n'da ra ngu man'da da t'ɛspi xinda gue'u yú t'uhni. ⁴Pe madague'bu i ørpa rá 'befi Oja u yu ja'i, tengu bi 'yøt' ra Moisés, pe nu'a Oja i øzehe gátho rá 'befi. ⁵Nguetho rá 'yɛhe Oja a ra Moisés, ne bi ja'ts' rá befi bi jamansu gátho yú t'uhni Oja maya'bu. Ne nu rá 'befi ra Moisés bi 'yu i ts'u a rá 'befi

ra Cristo da 'yot' 'bu bi zøhø. ⁶Pe nu ra Cristo rá Ts'unt'u Oja a, ne bi ja'ts'i bim hmu nangu'e'u n'dam'buí yú t'uhni Oja. Ne guectahú ya n'dam'buí yú t'uhni gahú Oja, 'bu dadí thoctahú dí pəhmbú majuəni a, ne'bu dadí thoju a nán johyahú a ran ho dí tømhbú.

**Da zin yú t'uhni Oja da
hyurpa yú mbuí**

⁷Janangue'a i ɛn'a rá Hogandəhi Oja bu ja rá t'ohni:

Nuya ra pa i jabu ya in zo ahú Oja. Pe ɛmme xun ho 'bu gui 'yøhmbú a i xi ahú.

⁸'Yo gadí ʉt' ni mbuíhu tengu bi 'yot'u mí ten ra Moisés, bi numan'utho Oja 'bu mín 'yo bu ja ra uhái.

Ne bi zä Oja u yu ja'i nangu'e 'be'a bi numanhose.

⁹Nu nim bombøtahú bi 'yørca ran ts'äte ne bi numan'uthogui 'bu nyote njeja mín 'yo bu ja ra 'yu, madague'bu bi nu xun ngu yun t'ot'e gue dá ut ma ts'edi, bi 'yɛn Oja.

¹⁰Janangue'a dán cuɛgä nangu'e'u yu ja'i, nguetho thocpa thoho i 'uegue nangu'e yú mbuí, hin jam'bu bi ba a ra 'yu dá xifi, bi 'yɛn Oja.

¹¹Janangue'a ɛmme dán cuɛgä nangu'e'u. Majuəni dá ma, hin ga singä bu ja ra häi u ngue da hyu yú mbuí, bi 'yɛn Oja.

¹²Ma zi cu ahú, pe dam fəhmbú. Xi'bu n'da ahú gui 'uehmbú 'bu dín ja ahú ra ts'ombuí, gue gui 'yɛna hin gui nde gui 'yɛc'yɛihú Oja, i

'buí. ¹³Pe n'da ngu n'da ahú damim fəxhu bu ja ra hoga'yu, n'da pa ngu n'da pa, janya i sä ga øhmbú a im ma Oja, yu pa ya. Ne nu'bu dín jabu gui 'yøthu, xinga n'da ahú da hyä ahú yu ts'oqui, gue di 'bät'a ni mbuíhu. ¹⁴Nguetho dí comhbú a rán ho ra Cristo 'bu dí thoju a ní hyu ma mbuíhu a, gue'bu go rán zegui tengu 'bu rá mbúdi dá tømhbú. ¹⁵Janangue'a i xiju a rá t'ohni Oja ya:

ɛmme xun ho 'bu gui 'yøhmbú a rá nde Oja gue in zo ahú ya.

'Yo gadí ʉt' ni mbuíhu tengu bi 'yot'u 'da bi numan'u tho Oja, bi 'yɛna.

¹⁶To'o u bi 'yøh rá m hma Oja ne bi numan'u tho. Ha hinga gue u yu ja'i bi yan Oja nangu'e'a ra häi Egipto mín 'yohú ra Moisés. ¹⁷Ne to'o bi un ra cue Oja gätho nyote njeja. Ha hinga guet'u bi yan Oja bu ja ra häi Egipto, bi 'yot' yu ts'oqui, janangue bi du bu ja ra uhái. ¹⁸Ne to'o u majuəni bi t'ɛmbi hin da hyurpa yú mbuí Oja. Ha hinga guet'u him bi 'yɛc'yɛi Oja. ¹⁹Gam bɛmhbu ya hanja him bi zä bi zin Oja u, nguetho him bi 'yɛc'yɛi Oja u.

4 Nuya i jatho ga suhú, janya i ja yu pa i xiju Oja da zinju bu ja rá ngu ngue da hyurca ma mbuíhu. Xøhma ts'urbu thoho hin da zøni ga cəthu bu. ²Nguetho neju bi siju a ram hma gue dí cət'a n'da, tengu bi sih yu ja'i mí 'buh maya'bu, gue'u bin 'yohú ra Moisés. Pe nu'u, him bi zä í ts'im bu a ram hma bi sifi, nguetho him bi nde bi ba u gue majuəni a. ³Pe nuju gue dí pəhmbú majuəni a ram hma, guenju gue ga cəthu bu da hyurca

ma mbuihũ Ojã. Ne guepũ him bi zã bi yut'u 'da, bi 'yẽn Ojã:

Janangue'a dãn cuegã nangue Ʃ,
ne majuaŋi dá ma,
njãm'bu ga singã Ʃ gue da hyu
yú mbui, bi 'yẽn Ojã.

Pe bi du'mi bi xih yũ ja'i gue da zim bu 'bu mí jua a bi 'yõt' ra ximhäi Ojã, ne bin säya bu, bi hyu rá mbui zehẽ. ⁴Tengu bi ma rá t'ohni gue nubũ bi ma, gue:

Ná yoto ma pa bin säya Ojã 'bu mí jua a bi 'yõt' ra ximhäi.

⁵ Pegue bi xi'u buya nangue'u 'da mín 'yohũ ra Moisés:

“Njãm'bu ga singã Ʃ gue da hyu yú mbui,” bi 'yẽn Ojã.

⁶Pe guehma 'bui to'o din säya bu da hyu yú mbui. Pe hinga gue'u 'da bi sifi maya'bu, nguetho him bi 'yẽc'yei a ram hma. ⁷Pegue bi 'yu Ojã n'da ra pa mahõn'a, gue ra pa i jabũ ya, tengu bi ma ra David nangue Ʃ xũn ngu yũ jeya xí thogui 'bu mí 'bũh ra Moisés. Ne gue'a ram hma xí hmangua, gue ẽna:

Nuya ra pa i jabũ ya in zo ahũ Ojã. Pe ẽmme xũn ho 'bu gui 'yõhmbũ a i xi ahũ.

'Yo gadí Ʃ't' ni mbuihũ tengu bi 'yõt'u 'da bi numan'ũtho Ojã, bi 'yẽn'a ra David.

⁸Nu'a ra Moisés bim pommi a ra Josué bi thoqui bi zix Ʃ yũ ja'i. Bi säyabi bu ja a ra häi Canaan bi un Ojã, bin johya bu. Pe nu'bu da gue'a ran johya bi man a Ojã, hin xtã ma mahõn'a Ojã nangue man'da ra pa 'bu. ⁹Janangue'a guexta'a i ja n'da ra xequi í juadi xũn ho, guepũ da hyurca ma mbuihũ Ojã, gue yú t'ũhñigahũ a. ¹⁰Nu'u to'o da yut'i gue da hyurpa yú mbui a Ojã, din

säya nangue gãtho yú 'befi Ʃ tengu tho Ojã bin säya nangue gãtho rá 'befi bi hyu rá mbui 'bu mí jua a bi 'yõt' ra ximhäi. ¹¹Janangue'a nde'bu ẽmme ga ndehũ ga cũthũ bu. Hin ga õthũ tengu Ʃ him bi 'yẽc'yei ram hma 'bu mí xi Ojã. ¹²Pe nu'a ráam hman Ojã dim pefi tengu'bu ra theni yoho yú het'i, pe man'da i ja rá ts'edi a xinda gue ra theni, ngue i sä da zõrpũ mbo ní mbui n'da, i urcahũ 'be'a gãtho díam bẽmhbu mbo ma mbuihũ, 'be'a majuaŋi dín nde ga õthũ, ngue nda'a bi bẽngahũ Ojã, ne nda'a dá bẽnsehũ. ¹³Xinga n'da Ʃ bi 'yõt'a Ojã gue i sä da 'yãcpi 'be'a mbẽni, gãtho i pađi, ne di nequi bu ja rá dá a to i haşcahũ ra güenda.

Nu ra Jesús ma hmumbãjahũ xũn ndoho rá ts'edi

¹⁴Nu ra Jesús rá Ts'unt'u Ojã, i t'ẽmbi ma hmumbãjahũ nguetho ma hocpatehũ a. Ne bi zõm bu mbo mahõts'i. Ne i fãxcahũ a gue i ja rá ts'edi mixte. Janangue'a ga thoqui ga tenhdũ a ráam hma. ¹⁵Nu ra Jesús ma hmumbãjahũ i pađi hinga gãtho dí häthũ Ʃ dí sähũ, nguetho bi zã 'be'a gãtho dí sähũ. Pe hin jam'bu bi 'yõt'a n'da ra ts'oqui. ¹⁶Janangue'a hin ga suhũ dan yãhũ Ojã bu bí ja rá ts'edi, nguetho di huẽgahũ ne di pungahũ, ne da mbãxcahũ a ra ora dí homhbũ a.

5 Bi than'dũ 'da yũ ja'i israel 'bu maya'bu ngue dim hmumbãja. Ne da 'yãp'a Ojã nangue gãtho mi'da. Ne midí thocpa Ojã Ʃ yú 'bõts'e nangue Ʃ yũ zu'uẽ bi tho, gue ní mba ma punbi yú ts'oqui yũ ja'i. ²Ne nangue yũ ja'i thoho Ʃ yũ

hmumbäjä, hinga gätho bi 'yøt'e xun ho, ngutho u mi'da yú miä'i'ihü. Janangue'a bi zä janate tho bi hoc'u yu 'yambüi ne yu 'yøt'ats'oqui. ³Ne jatho rá mbüdi midí un Ojä n'da ra 'bøts'e ra mbäjä nangue yú ts'oqui zehé, tengu bi 'yøt'e nangue yú ts'oqui yu jä'i. ⁴Njongui sä da 'yøt'e gue dim hmumbäjäse, ne hønt'a Ojä sä da huahna n'da ra hmumbäjä, tengu 'bü mí huahna ra Aarón. ⁵Ne ngutho bin ja nangue ra Cristo, him bi manse gue dim hmumbäjäse, pe Ojä bi un ran t'edi gue dim hmumbäjä, tengu bi ma rá t'ohni Ojä 'bü mí 'yena:

Nu'i ma 'dats'unt'u i,
dadí 'da'a ni ts'edi ya.

⁶Ne bi 'yembi mahøn'a:

Nu'i gam mbäjä gätho yu pa ya,
tengu ra hmepya bi 'yøt' ra
Melquisedec,

bi 'yæn Ojä bü ja rá t'ohni. ⁷Nu ra Cristo 'bü mim 'bücua ja ra häi, zäi nan yäui Ojä, bi 'yöp rá mfäts'i da dáp'u. Nts'edi bi mbafi ne bin zoni. Pe bi badi ja rá ts'edi Ojä da yam bü ja ran däte. Ne bi 'yø Ojä 'bü mí nde din unse bü ja rá pähä Ojä. ⁸Nu'a ra Cristo, madague'bü rá Ts'unt'u Ojä a, pegue bin jä'i a, janangue'a bi xänba yun unbi 'be'a dí 'yörpa rá pähä Ojä a. ⁹Bin jabu bi 'yøt'e, janangue'a bi zøni bi jä'ts'i gätho rá pähä Ojä. Ne bi zä bi un'na ra te mazäi gue to'o gätho da 'yęc'yei a. ¹⁰Nguetho bi huan Ojä a gue dim hmumbäjä nangue dyu 'yęc'yeihü, tengu ra hmepya bi 'yøt' ra Melquisedec.

Nts'utho 'bü ga penju

¹¹I ja xun ngu 'be'a dín nde ga xi ahü nangue a bim hmumbäjä

a ra Cristo. Pe xun hej ga xi ahü nguetho hin guí honi gui pähmbü. ¹²Ne xun ngu yu pa xu thogui gue mí ja ngue xquín xänbatehü, pe guexta'a i jatho da si ahü u yum hma hingui hej nangue Ojä. Nguetho gá cohi gán 'yambüihü. I jatho gui sihü ra xi'ba tengu'bü gyu 'uerehü, ne hin guí häthü gui sihü njuantho ran ts'ihme. ¹³Ne nu'a gnán ts'ihmehü ra xi'ba, in ja tengu yu 'uere, ne hinda ná pähmbü 'be'a ra te gue däm 'bühmbü njuantho. ¹⁴Pe nu ran ts'ihme xun ho nt'øt'e nangue yu dajā'i. Ne xun te yú mbüi nangue zäi din 'yomfëni, janangue'a pädi nda'a xun ho ne nda'a hingui ho.

6 Janangue'a nde'bü ga thoqui ga homhbü gue dan dajā'i'ihü. Nde'bü hinga hønt'a ga mamhbü a rá mbüdi bi sängahü nangue ra Cristo. Nde'bü hinga hønt'a ga mamhbü gue ga päh ma mbüihü gue mí gna xtá hyoju, ne hinga hønt'a ga mamhbü ga döp ma mbüihü Ojä. ²Nde'bü hinga hønt'a ga mamhbü ram hma dan xixyähü, ne nangue ran jäxa'ye, ne nangue da dambëni u xun du, ne nangue din ja ran juänbi 'bü rán zegui, nde'bü hinga hønt'u ga mamhbü ya, nguetho dí pähmbü nda'a u. ³Mbähä ga thoju 'bü da zä da xoc'a ni mbüihü Ojä, nguetho i ja mi'da. ⁴⁻⁶Nguetho nu'bü hin ga thohmbü, xøhma thoho da bëni da mbenc i 'da. Ne nubuya him man'dandj da nde ba pengui mahøn'a. Nguetho nu'bü mí numanho n'dandj rán nequi Ojä, ne bi zämanho a bi un Ojä, ne bin 'yohü rá Hogandähi Ojä, ne bi zämanho a rá hogamhma Ojä,

ne bi ba i ts'u rá ts'edi a ra 'da'yo ximhäi din ja. Pe nu'bu da mbengui, ya him man'dandí da zä di hoc yá mbüi mahøn'a. Nguetho im bñi tengu'bu da zä di cuat mahøn'a bu ja ra pont'i a rá Ts'unt'u Oja, ne di japi din thenda a ra Cristo. ⁷Nguetho tengu'bu n'da ra häi a ra ja'i, n'dandí ngu n'dandí din 'ye, i pøt'e, ne i pøts'e 'be'a pa nthuhu bu. Ne nu'a ra häi nu'bu di japi din ja 'be'a tupu a ra mbefi, da hyan rán japi Oja a. ⁸Pe nu'bu hin di japi da bøx'a 'be'a bi thupu, ne hønt'u yu 'uñi i ja bu, nte di muui 'bu. Ne hin da hnumanho a ra häi 'bu. Ne nzegui da mba nt'udi nangué ra sibi.

Bi zangba ma mbüihü a ra Jesús, dí tømhbü a ran ho ya

⁹Pe madague'bu njabu dá mamhbe, ma zi cu ahü, pegue dí haxhe njuani gan jahü tengu ra hogahäi, bin japi bin ja xun ngu 'be'a bi thupu, nguetho bi hoc'a ni mbüihü Oja. Ne xun ndoho ran japi ba ghe, guin nuhü. ¹⁰Nguetho xun ho øt' Oja ngue hin di pumbñi a ra 'befi gá 'yøthü, ne ran huçcate gá 'yuthü u 'da ni cuhü, nangué rá thuhu Oja, ne nangué a guí ødahü ya. ¹¹Emme dí ndehe gui thoju gan ghyahü, n'da ngu n'da ahü, gue'bu go rán zegui ra pa. Janangué'a da zøni gui hyámhbü 'be'a gätho guí tømhbü. ¹²Hin dí ndehe da yundanhÿçi thoho ahü, pe dami 'yøthü 'be'a mí øt'u 'da 'bu mí baði majuañi a rá m hma Oja, ne bi hyät'i bi zet yá mbüi, janangué'a bi hyan a ra herencia bi ma majuañi Oja. ¹³Nu Oja 'bu mí xih majuañi a ra Abraham, bi ma majuañi nangué rá

thuhu zehé. Nguetho njo'o man'da xun ndoho rá ts'edi hinda hønse a. ¹⁴Ne bi 'yæn Oja: "Majuani xun ngu ran ho ga 'da i, ne ga 'da i xun ngu nim bom'бето," bi t'emp'a ra Abraham. ¹⁵Nu ra Abraham büya bi hyät'i bi dø'mi, janangué'a bi hyani 'be'a bi xi a Oja. ¹⁶Nu'bu 'da yu ja'i im ma majuañi 'be'a da 'yøt'e, i ndønba rá thuhu Oja, ne ya him ma hyom mi'da yum hma dí hoc'a, nguetho i faði majuañi a bi ma. ¹⁷Ne'a Oja 'bu mí nde da 'yurcahü ngue majuañi a rá m hma, bi man rá thuhu zehé 'bu mí xiju ra herencia. Ngue gueju nts'änni ga hamhbü a. Janangué'a ga pañmbü njam'bu di pä a bi xiju. ¹⁸Janangué'a yoho bu dá pañmbü, rá m hmanse ne rá thuhu zehé, ga pañmbü hin dim fehni Oja, pe majuañi da zinju bu. Ngue gueju bá 'dahmbü bu mí ja xcá tuhü, dá benthü bu hapu da zinju ya. ¹⁹Janangué'a bi zinju bu a ra Jesús, bi zangba ma mbüihü bu mbo rá ngu Oja, njam'bu da hyegahü. ²⁰Nguetho m'bet'o bi yurpu a ra Jesús. Ne bi xi a Oja ngue bi hogahü ngue da numanhoju bu. Gue'a nam bøni ma hmumbäjahü, ngue i 'büi mazai, tengu ra hmepya bi 'yøt' ra Melquisedec.

Bim mbäjä ra Jesús tengu ra hmepya bi 'yøt'a ra Melquisedec

7 Nu ra Melquisedec bim hmuts'ut'abi bu ja ra hnini Salem, ne bim mbäjä nangué Oja mixtetho rá ts'edi. Ne nu ra Abraham 'bu mam bá tap'u 'da yu ts'ut'abi, bin c'at'ui ra Melquisedec, bi t'ap rán japi Oja nangué a ra

Abraham. ²Ne nu'a ra Abraham b̄ya bi un'na ra Melquisedec a ná 'det'a gue xpí hȳnba yún suih̄u, gue rán t'unni Oj̄a a ná 'det'a. Ne nu rá thuhu ra Melquisedec nde da ma “ra hoga hmuts'ut'abi.” Ne nde da ma gue “ra hmuts'ut'abi di hocpa ra sui,” ne gue'a nam b̄on'a rá thuhu rá hnini Salem. ³Ne hinga mf̄adi to'o rá ta ra Melquisedec, o to'o rá mbe. Ne hinga mf̄adi nda'a rá 'ȳu, ne hinga nt'o't'i gue'bu mím 'bui o gue'bu mí du. Janangue'a tengu'bu rá ts'edi rá Ts'unt'̄u Oj̄a bu ín 'yu a ra Melquisedec, gue dim mb̄jä gätho yu pa h̄on'bu go nj̄am'bu. ⁴Janangue'a sä ga p̄ahmbu ya gue x̄un ngu rá ts'edi ra Melquisedec 'bu min ja, nguetho gueise ma ngurpa b̄otah̄u ra Abraham bi un'na ná 'det'a bá tap'̄u yún suih̄u. ⁵Nu rán t'edi Oj̄a bi xi ̄u yú t'uhni ra Leví gue yú mb̄jä yu israel, gue da hȳcpa a ná 'det'a ̄u yú meni, madague'bu yúm bom'beto ra Abraham ̄u, pe nese ̄u. ⁶Pe nu ra Melquisedec, madague'bu hingui conhui rá 'yu ra Leví gue ra Abraham, pe bi un'na ná 'det'a gue'a bá t̄ah ra Abraham. Ne nu ra Abraham, madague'bu x̄un ngu rá ts'edi bu nam b̄en Oj̄a, nguetho bi xifi majuañi da 'ȳorpa a Oj̄a. Pe man'da ja rá ts'edi ra Melquisedec nguetho bi t'ap̄ a ran j̄api a ra Abraham. ⁷Ne mf̄adi nu'a di j̄ap'a n'da man'da ja rá ts'edi xinda gue'a pa ma j̄api. ⁸Pe nu'̄u yú mb̄jä ra israel z̄ai midin t'un'na ná 'det'a, pe yu j̄a'i ̄u, ne i tu ̄u. Pe nu man'da ra mb̄jä gue ra Melquisedec, i mam bu ja ra t'ohni tengu 'bu i 'b̄utho. ⁹Ne da z̄ä gam b̄mhbu ya, gue

gätho rá 'yu ra Leví, gue yú mb̄jä ra israel, gue i ap̄'a ná 'det'a ̄u yú meni, gam b̄mhbu gue ne'̄u tengu'bu bin jut'̄u 'bu mí un'na ná 'det'a xequi a ra Melquisedec a ra Abraham. ¹⁰Nguetho da z̄ä gam b̄mhbu nangue ra Abraham, tengu'bu ya x̄mín 'yoh̄u yúm bom'beto 'bu mín c'at'ui ra Melquisedec, madague'bu hin nám 'bui. ¹¹Bim mb̄jä ra Aarón gue rá 'yu ra Leví, ne rá ngurpa b̄ota a ra Abraham a. Ne gue'̄u bim mb̄jä ̄u nangue'̄u yu israel, tengu bi man yún t'edi Oj̄a. Pe nu'bu da guehya yú 'befi gue ní yan Oj̄a ̄u yu j̄a'i, him mi jatho xtí nequi man'da ra mb̄jä gue n'dan'yo 'bu, tengu ra hm̄epya bi 'yu a ra Melquisedec, ne hin nangue a ra Aarón. ¹²Pe nu'bu mí mba ma pädi yu mb̄jä, ne 'be'a mí ot'e, ne ̄u yan t'edi mí tenni, mí jats'editho da mba ma pädi ̄u. ¹³⁻¹⁴Bi 'ȳen ra t'ohni gue nu a man'da ra mb̄jä gue ra Cristo a, bim 'bui nangue man'da rá ts'unt'̄u ra Israel, ngue hing rá 'yu yu mb̄jä. Nguetho mf̄adi x̄un ho gue ma Hmuh̄u bim 'bui nangue rá 'yu ra Judá. Ne nte bi ma yún t'edi ra Moisés, gue dim mb̄jä a rá 'yu ra Judá. ¹⁵Pe man'da gui p̄ahmbu 'be'a dá mangä 'bu guim b̄mhbu nangue a ra Melquisedec, gue i udi tengu a man'da ra mb̄jä, nu'a ra Cristo a. ¹⁶Ne hin nangue ra 'yu bi man ̄u yan t'edi da z̄ä dim mb̄jä a ra Cristo. Ne xín nangue ̄u yan t'edi mí ma 'be'a da t'ot'ua bi den'na, nguetho him mán ts'änni z̄ai din ja ̄u. Pegue bi z̄ä bim mb̄jä nangue a rá ts'edi a rá tese nj̄am'bu da z̄ä da guadi. ¹⁷Gue'a bi man Oj̄a:

Nu'i gra mbäjä mazai,
 tengu ra hmepya bi 'yøt'a ra
 Melquisedec,
 bi 'yæn Ojä. ¹⁸Gue'a án t'e'ts'a ra 'yu
 gue bi ts'an maya'bu, nguetho mbe
 nte midí muui a. ¹⁹Nguetho njom
 bi zä bi hocpa yú ts'oqui u yæn
 t'ëdi bin t'un ra Moisés. Pe bi nequi
 man'da xæn ho, gue i sixcahu bu bí
 'bu Ojä. ²⁰Ne man'da xæn ho ra 'yu
 nangué ra 'da'yo mbäjä, nguetho bi
 manse rá thuhu Ojä 'bu mí un rán
 t'ëdi a rá Ts'unt'u. ²¹Pe nu mi'da
 yu mbäjä 'bu mín t'un yú 'befi,
 him bi hndønba rá thuhu Ojä. Ne
 nanguéhna ra hmumbäjä, bi manse
 rá thuhuse Ojä. Tengu bi mam bu ja
 rá t'ohni Ojä, bi 'yæmp'a rá Ts'unt'u
 zehé:

Nugä dra Ojä, dí manse ma
 thuhugä, ne hin ga pä a dí ma.
 Nu'i gam mbäjä gätho yu pa
 mazai,
 tengutho ra hmepya bi 'yøt'a ra
 Melquisedec,
 bi 'yæn Ojä. ²²Nu ra Jesús, da zä di
 jä'ts'a n'da ran hoqui man'da xæn
 ho xinda gue'a mí ja mam'bet'o,
 nguetho dim hmumbäjä mazai
 a. ²³Nu'u 'da yu mbäjä bi zøni
 xæn ngu mí 'bui, nguetho i tu, ne
 him bi zä bi thoqui høn'bu go
 njam'bu. ²⁴Pe nu ra Jesús hingui
 tu, janangué'a njo'o man'da sä da
 hyänba rá 'befi. ²⁵Janangué'a da
 zä di hoqui xæn ho u to'o da zøm
 bu 'bu Ojä ya, nangué a ra Cristo.
 Nguetho i 'bui mazai, da zä thocpa
 thoho da 'yöp'a Ojä nangué u to
 da zøm bu. ²⁶Njuantho e gue'a ra
 Jesús a ma hmumbäjä dí homhbu.
 Nguetho xæn hotho a, nte in
 dupatese him bi 'yøt' yu ts'oqui,

ne him bi hyänba yúm 'bäi u yu
 ts'om'bäi, ne man'da i pa nt'ëspi
 gue i ja rá ts'ëdi bu mahëts'i. ²⁷Nu
 yu jä'i 'bu mim hmumbäjä di thoqui
 da mbøspa Ojä gätho yu pa, mbüdi
 bi mbøspe nangué yú ts'oqui zehé,
 ne m'bejua yú ts'oqui yu jä'i. Pe nu
 ra Jesús him bi 'yøt'e tengu u, ne
 n'dandí thoho bi mbøspa Ojä 'bu
 mi un rá tese, nguetho di muui
 mazai a. ²⁸Nu rán t'ëdi Ojä bi man
 ra Moisés bi t'ëmbi dim hmumbäjä
 u yu jä'i thoho, pe him bi hyät'i bi
 jä'ts'u yún t'ëdi Ojä. Pe nu'bu mí
 manse rá thuhu Ojä, bi ma gue dim
 hmumbäjä rá Ts'unt'u zehé. Ne nu'a
 gätho bi jä'ts'u yæn t'ëdi ne bi juadi,
 nte di 'beh ya. Ne gue'a rám poniui
 a rán t'ëdi Ojä bin t'un ra Moisés a
 ra Jesús.

**Nu ra Jesús bin hocpate
 nangué ra 'da'yon hogui**

8 Bí 'bæpæ mahëts'i a ma
 hmumbäjähu gue ma
 hocpatehu, 'darpæ ní mandaui a
 tæte thoho rá ts'ëdi. Ne guehna
 man'da jats'ëdi na dí xi ahü. ²Ne
 dim mbäjä bu majuañi i pa nthände
 Ojä bu mahëts'i, tengu'bu ra nija
 bi 'yøt' Ojä, ne him bi hyøh yu jä'i.
³Gätho yú hmumbäjä u yu israel, bi
 ts'änni di un yu 'bøts'e nangué u yu
 zu'uë bi tho, ne mi'da. Janangué'a
 ne a ra Jesucristo ja 'be'a bi uni,
 nguetho ne a ra hmumbäjä a. ⁴Pe
 hinga guecua ja ra ximhäi bim
 mbäjä a. Ne nu'bu xtín zangua ja
 ra häi, njam'bu xtán zä xtím mbäjä.
 Nguetho hing rá 'yu ra Leví a, ne
 hing yu zu'uë bi mbøx'a, tengu
 bi man rán t'ëdi Ojä bi man ra
 Moisés. ⁵Ne nu'a ra nija bu midím

pe u yu mbäjä ua ja ra ximhäi, n'da ra hmepeya thoho gue 'be'a ørpø mahçts'i. Nguetho bi sih ra Moisés 'bø mí dæp'a ra nijä: "Dami jamansu 'be'a gui jap'u i ja bø, ne 'be'a gätho gui 'yørpø, tengu thoho dá ut'a 'bø gmí 'bøpø ja ra t'øhø," bi 'yçmp Ojä. ⁶Pe nu ra Cristo bin t'un'na n'da ra 'befi çmme man'da xøn ho xinda gue'u mi'da yu mbäjä. Nguetho din hocpate nanguie ran hogui man'da xøn ho 'be'a gätho i ma da 'yørcahø. ⁷Nu'bø xtán zä xtí hocpa n'da a rá mbødi ran hogui, him mí jatho xtán ja a ná yoho ran hogui. ⁸Pe nu Ojä him bi zä bi numanho yu jä'i nanguie a ran hogui mí ja, pe guexa'ta ndupate bø na nu Ojä u. Janangue'a bi 'yçna:

Da zøn'a n'da ra pa
ga øt'ä n'da ra 'da'yon hoqui
mahøn'a nanguie yu me israel
ne yu me judá.

⁹Ne hin din ja tengu ran hoqui
dá xi u yám bombøta
'bø mambá jøcpø ra häi Egipto,
ne dá jamansu.

Dá xifi xtí jä'ts'i, pe him bi
hyät'i da 'yøzehe man hoqui
dá xifi, gue man t'çdi dá xi a
ra Moisés.

Janangue'a him bi zä dá
numanho u, bi 'yçn'a ra Hmu.

¹⁰Pe nu ran hoqui ga ørpa yu
israel 'bø m'bejua mi'da yu pa,
din ja tengu gam mangä ya.
Ga un man 'yomfçni bø ja yún
'yomfçni u,
ne ga japi mpähä thoho da
dengui.

Janangue'a da numanhogui, ne
ga øt'ä gue yú Ojägä u, ne din
ja gue ma t'ühni zehe u bøya.

¹¹Ne hinga hnehi thoho 'bo'o da
xänba u,
ne njon da sänbi gue da baqui,
nguetho gätho da bæ zehe u,
yu ngurpi o gue yu jä'i thoho.

¹²Ne ga punbi nanguie ran ts'o,
ne him man gam bængä u yú
ts'oqui,

bi 'yçn Ojä. ¹³In jabø a ra 'da'yon
hoqui, ne gue'a í t'çmbi ra
nyonhoqui a mí ja, gue ya bi juah
rá 'befi a, ne ní mba bø dim 'bedi
'bø mí man na.

Necua ja ra häi mí ja rá
ngu Ojä, nepø mahçts'i

9 Nu'a rá mbødi ran hoqui, mí
ja yún t'çdi nanguie yun t'øt'e
mí t'ørpø ja ra nijä ua ja ra ximhäi.
²Ne nu'a ra nijä bi t'øt'e, bin ja n'da
ra cuarto rá mbødi, t'çmbi xøn
dæxqui, guerpø mí ja rán 'døgue yu
lámpara, ne ra mexa gue i çux yu
'bøxthuhme. ³Ne mí ja man'da ná
yoho ra cuarto gue nubø mbo, män
joti n'da ra 'bøt'e, guerpø mí t'çmbi
man'da xøn dæxqui. ⁴Ne nubø, mí
ja bø ra mexa ra oro guerpø mí zø
ra xeca xiza yumanho. Ne a rá
huada ran hoqui gue män jots'i ra
oro gätho yú hyo. Ne nubø mbo ra
huada mí høpø n'da ra xaro gue ra
oro, mí o bø zi ts'u ra hme i t'çmbi
ra maná. Ne a rá tøhø ra Aarøn gue
bi 'dogui, ne u yu xïndo bi t'o't'a ra
nyonhoqui, gue nu'u yún t'çdi Ojä
maya'bø. ⁵Ne nu rán jo'mi ra huada,
n'da ra xithe i t'çmbi ran ts'äya ram
punbate. Ne mí tøpø yoho yú pøte u
yú mbädi Ojä mahçts'i, mí com'pø
mate ra xithe bø mí pa nsits'i ra
ji díim punba yú ts'oqui yu jä'i. Pe
hinga xøt'a ga xi ahø 'be'a nam

bøn'u gätho yu hmepya mí ja bu mbo ra niĵa. ⁶Bin jabu bi t'öt'e. Nu yu mbäĵa thoho, thocpa thoho mí curpu a rá mbüdi ra cuarto, gue mí øt' yú 'befi nangué ran dände bu ja ra niĵa. ⁷Pe nubü ná yoho ra cuarto man'da xun duxqui, hont'a ra hmumbäĵa mí thopu, hont'a n'dapa thoho i tho a n'da jeya. Ne nu'bu mí yurpu, i thexpu rá ji yu zu'ue gue mí xixpu, nangué rá ts'oqui zehé 'bu rá mbüdi, ne nangué yú ts'oqui yu ja'i 'bu ná yondi. ⁸Nu'a rá Hogandahi Oĵa di jajü ga paĥmbu, ngue hin ní soc'a ra 'yu ní mba bu bí 'bu Oĵa 'bu gätho mí t'øthoho ran dände bu ja a ra niĵa ua ja ra ximhäi. Ne gue'a n'da ra hmepya bi 'yu a ra 'bøt'e mí corpu man'da xun duxqui, mí corpa bu u yu ja'i. ⁹Gätho u yun t'øt'e mí t'ørpu ja a ra niĵa, n'da ra hmepya thoho nangué a njuantho i jajü ya. Nguetho yun t'unni ne yu 'bøts'e bi un'na Oĵa, him bi zä bi hocpa bu mbo rá mbüi u mi øt'e. Janangué mí pa nĵorpi bu u. ¹⁰Nguetho hont'a mí man yun t'edi nangué yun ts'ihme midí hoqui, ne midín xut'i. Pe nu'ü gue'u 'da yun t'edi gue i ja thi. Ne gue'a bi zän Oĵa da 'yøt'u, ja gue'bu mam bá ģh ra Cristo, ja bi nequi a majuani ra 'yu ja rá ts'edi a büya. ¹¹Gue ya bá ģh ra Cristo, ne gue'a ma hmumbäĵahu a, nangué ra 'da'yo nhoqui i ja ya. Ne nu'a ra niĵa guerpü dim pehna ra mbäĵa ya, man'da xun ho, ne guerpü majuani bu. Ne him bi 'yøt' yu ja'i, nguetho hing ra ngugua ja ra ximhäi a. ¹²Pegue mahęts'i bu bi yut' na ra Cristo ya, tengu ra hmepya bi 'yuh yu hmumbäĵa 'bu mí yurpu man'da

xun duxqui. Ne ya hin di un yú ji yu t'ude'yo o gue yu t'undani, pe bi un rá jise. Ne n'dandi thoho bi yurpu, ne bi yanju xun ho a. ¹³Nu rán t'edi Oĵa bi t'ęmbi xun ts'o ní ngøc'yei n'da 'bu xí dá a n'da ra du. Ne bi ma jatho da mba ma c'uaspa rá ji ra toro ne ra de'yo, ne rá 'bospa a ra t'usundani gue bi t'upü ja ra sibi. Ne gue'a dí hocpa ní ngøc'yei n'da a. Ja bi zä bi dände Oĵa u büya. ¹⁴Pe gam beĥmbu man'da ęmme i ja rá ts'edi a rá ji ra Cristo, bi mberca ma ts'on'yomfęnihü midí 'uegahu nangué Oĵa, n'dahma da zä ga ørpahu rá 'befi Oĵa gue i 'büi. Nguetho hin'yü rá ts'oqui ra Cristo, ne bin unse bu 'bu Oĵa, ra 'bøts'e gue mazai di muui bu nam beĥ Oĵa. ¹⁵Nu ra Jesucristo bin hocpate nangué ra 'da'yon hoqui 'bu mí du. Janangué'a gätho bi mba mahoqui ma ts'oquihü, gue gueju mí tenhdü rá mbüdi ra yonhoqui. Hinga høngdahü, pe ne u mí 'bu 'bu hin nán ja a ra 'da'yon hoqui. Ne nubüya gätho bi zä dá comhbü ran ĵapi mazai gue bi xi Oĵa u bi zohni. ¹⁶Nu'bu i man'a n'da to'o da zocpa u 'be'a pe'ts'i, pe 'be da fađi 'bu majuani bi du, ja da t'øt'a xi ma büya. ¹⁷Hingui sä da t'øt'a xi ma 'bu i 'butho, hinda høn'bu bi du. ¹⁸In jabu bin ja 'bu rá mbüdi a ran hoqui bi man Oĵa, gue bin ho 'bu mí mba m'bänbi rá ji n'da ra zu'ue, ja bi fađi majuani bi nu ran däte büya. ¹⁹Janangué'a nu'a ra Moisés 'bu mí xih rán t'edi Oĵa gätho yu me israel, ne bi c'uaspa ra ji büya. Bi mit' ra thenga xide'yo ne n'da ra t'u'yeza gue n'youi yú paxi, ne bi garbu ja ra dehe n'youi rá

ji ra t'undani ne rá ji yu chibo, bi c'uaspa bu ja rá søcua i man rán t'ëdi Oja, ne gätho yu ja'i bi mba ma c'uaspi a ra ji buya. ²⁰Nubuya bi 'yëna: "Nuna ra ji, guehna dí hoc'a ran hoqui na, gue bi man Oja nanguëju. Nuya da zä di punga ma ts'oquihä," bi 'yën a ra Moisés. ²¹Ne nubuya bi c'ualts' ra ji bu ja rá nija Oja, ne 'be'a gätho mí ja bu mbo mí pa nthoni bu ja rán thände Oja, gätho bi mboxpu yu ji. ²²Ne i mam bu ja rán t'ëdi Oja, gue gue'a ra ji í hoc'u 'be'a gätho mí t'öt'e. Pe nu'bu hin dim fän ra ji, hin'yü ra punbi nanguë ra ts'oqui, i em bu män t'ot'i.

Í 'uec yu ts'oqui a ím 'bøts'e ra Cristo

²³Nu'a ra nija, n'da ra hmëpya thoho mí ja ua ja ra häi, bi mba ma hoqui nanguë u yú ji yu zu'uë mí hma. Jananguë'a bin ja ra 'bøts'e man'da xün ho gue dí hogahü, tengu'bu dyú nijahü majuani bu mahëts'i. ²⁴Ne hinga guëpu ja ra nija bi 'yøt' yu ja'i i 'büh ra Cristo ya, nguetho yu hmëpya tho u nanguë a majuani rá ngu Oja. Pe e guëpu mahëts'i bi yüt'i, i äp Oja ya nanguëju. ²⁵Nu yú hmumbäja yu israel, jeya 'bu njeya mí curpu ja ra cuarto man'da xün duxqui, midí un ra ji, pe hin rá jise. Pe nu ra Cristo hinga thocpa thoho di un ra 'bøts'e. ²⁶Xi'bu xtín ja tengu yu hmumbäja, jeya 'bu njeya midí un ra ji. Mí jatho xün ngu yu nidi xtán du ra Cristo 'bu, gue'bu go rá mbüdi ra ximhäi. Pe him bin jabu bi 'yøt'a. Pe nuya n'dandí thoho bi zøcua ra Cristo gue bin unse bim 'bøts'e zehë, gue í 'uecpa yú ts'oqui yu

ja'i. Ne guehya yu pa gue di ja'ts'a mí hma mám 'bet'o. ²⁷Tengu yu ja'i, nts'änni n'dandí thoho da du, ne m'bejua da nu ran juanbi. ²⁸Ne ngutho ra Cristo, n'dandí thoho bin uni bim 'bøts'e, ngue bi 'uecpa yú ts'oqui u xün ngu yu ja'i. Ne m'bejua ba pengua da zin u i tømí, pe hin dí 'yëhe dí 'uec yu ts'oqui mahøn'a.

10 Nu'a ran t'ëdi bin t'un ra Moisés nanguë yu 'bøts'e bi 'yøt' yu mbäja, n'da ra hmëpya thoho nanguë'a ran ho bá ëhya. Ne hinga gue'a majuani ran ho a. Ne njam'bu bi zä bi mba ma hocpi yú ts'oqui u mí øt' yu 'bøts'e, madague'bu njeya 'bu njeya midí uni. ²Nu'bu da gue'u yu 'bøts'e xtán zä xtín hoc'u, pe n'dandítho xtí uni, ne xtá 'yë'ts'a ní un yu 'bøts'e 'bu. Ne ya xtám badi n'dandí thoho bi bo yú ts'oqui buya. ³Pe nanguë yu 'bøts'e bi uni gätho yu jeya, bi japi da bëni gue in dupate tho yú ts'oqui. ⁴Nguetho hinjam'bu da zä di punba yú ts'oqui n'da u yú ji yu ndani ne yu de'yo. ⁵Jananguë'a bi 'yën ra Cristo 'bu mí zøcua ja ra häi, bi 'yëmp'a Oja rá Ta:

Hinga njuantho gue'u yu zu'uë guí nde.

Jananguë gá jaqui dán ja'igä ngue dam 'bøts'egä, bi 'yën'a ra Cristo.

⁶Ne hin gnán johya n'da ran t'unni ngue yu zu'uë bi t'upu ja ra sibi, xínga gue'u yu 'bøts'e nanguë yu ts'oqui.

⁷Jananguë dá ëngä: "Bá ëcä ya ga øt'ä ni pähä ma Oja i, dam 'bøts'e zehëgä, tengu män t'ot'i bu ja nim hma,"

bi 'yɛn'a ra Cristo. ⁸Nu'a rá mbudi bi mangua, hin nán johya Oja ɯ yu 'bɔts'e gue yu zu'uɛ bi t'udi nangue yú ts'oqui n'da, madague'bu gue'a bi man'a n'da rán t'ɛdi a. ⁹Pe xø bi 'yɛm mahøn'a buya: “Bá ɛcä ya gue ga øt'ä ni pähä, ma Oja i, gue dam 'bɔts'e zehégä.” Gue nde da ma, dí 'ueh ya yu 'bɔts'e mí ja, ne din ja nu man'da ra 'bɔts'e. ¹⁰Nu ra Jesucristo bi 'yøt' rá pähä Oja, gue bi unse rá ja'i n'dandj thoho bi juadi. Janangue'a bi hogahü Oja ya. ¹¹Nu yú mbäjä yu israel mí øt'u yú 'befi gätho yu pa, ne thocpa thoho midu un yu 'bɔts'e, madague'bu hinjam'bu mí sä di hocpa yú ts'oqui n'da ɯ. ¹²Pe nu ra Jesucristo n'dandj thoho bin uni bim 'bɔts'e nangue ma ts'oquihü, pe him man'dandj din uni. Ne bí 'bøpü 'darbü ní mandauu Oja ya. ¹³Ne guerpü bí 'bøpü ya, gue'bu go bi dap'u yün süihü. ¹⁴Nguetho nangue n'dandj thoho bin unse, janangue'a bi juadi bi hoc'u to'o bi 'yøt'e yú mbeti. ¹⁵Guese a rá Hogandähi Oja di jajü ga pähmbü a mangua, 'bu mí ma:

¹⁶Nu ran hoqui ga ørpa yu ja'i 'bu m'bejua, din ja tengü na, ga bønba bu ja yú mbui ma pähä zehé, da ndese gue da dengui. Nguetho ga un man 'yomfëni bu ja yün 'yomfëni ɯ.

¹⁷Ne xø bi 'yɛm mahøn'a:
Him man'dandj gam bängä yú ts'oqui, ne xinga gue'u yüm fe'ts'i mí øt'u,
bi 'yɛn rá Hogandähi Oja. ¹⁸Nangue Oja bi punga ma ts'oquihü, hingui sä ga unhdü mi'da yün t'unni dí punga ma ts'oquihü.

Da zä ga sømhbu bu 'bu Oja

¹⁹Ma zi cu ahü, gam bëmhbü nangue a ra nyonhoqui mi ja, njo'o n'da ra ja'i thoho mí sä da yørpu man'da xün dæxqui, ne gue'a í t'u'a ra 'bøt'e mí ndam bü. Pe nuya bi zä dí cuthü bu ja a rá ngu Oja mahɛts'i, man'da xün dæxqui. Ne dí cuthü nangue a rá ji ra Jesucristo, bi hogahü. Ne hin dín suhü ya. ²⁰Ne dí cuthü nangue a ra 'yu ma'da'yo gue i 'bui. Nguetho bi 'uegahü ra 'bøt'e mí ndam bü ja ra goxthi, 'bü mí unse rá ja'i ra Cristo ya. ²¹Nu'a ra Jesús, gue'a ma hmumbäjähü, nanguejü gue yút'ühnigahü Oja. ²²Janangue'a mbähä ga sømhbu bü 'bu Oja ya, n'dat'a gam bëmhbü majuani i ndejü. Nguetho bi mberca ma mbühü nangue rá ji ra Cristo, hin gam bëmhbü gue dín dupatehü yu ts'oqui ya. Ne tengu 'bü am 'be't'egahü a ra dehe xün güe. ²³Ne ga thoqui ga mamhbü a ran ho dí tømhbü, hin ga suhü. Nguetho majuani di ja'ts'a rá m hma bi xijü Oja gue di pøjü. ²⁴Mbähä dan xänbahü ga øthü ran huɛcate, ne 'da dán ɛhyadahü ga øthü a. ²⁵Ne hin ga øthü tengu øt'i 'da him mi søm bü ja mam petihü. Pegue mbähä ga thoqui dam petihü, ne dan xänbahü n'da ngu n'dajü. Ne man'da ga humbi ga øthü ya, nguetho ya mí ts'utho ba ɛh ra Hmu. ²⁶Pe nu'bü dí ndese ga thoctahü yu ts'oqui 'bü ya má pähmbü a majuani, tengu'bü hin dá jamansuhü a ra 'bɔts'e xtím pughü. Pe ya hin'yü 'be'a man'da sä ga umhbü buya, gue dí mba ma pungui ma ts'oquihü. ²⁷Pe hønt'a

ra mbidi gan nuhü 'bú, gue ran unbi dí co'ts'a Ojã, nangué ra sibi nts'utho 'bú bi de, gue di jua u yán súihü Ojã. ²⁸Gam bẽmhbü tengu ran t'ẽdi bin t'un ra Moisés, gue'bú 'bú a n'da i øt' ram f'e'ts'i, ne di nequi yoho o gue hyu yu testigo gue bi nu, bi tho a ra ja'i búya, ne hin da mba ma huẽqui. ²⁹Pe ha hin díim bẽmhbü gue man'da nts'utho ran ts'embi ga nuhü 'bú díim bẽni ga nemhbü bú häi a rá Ts'unt'u Ojã, ne dí emhbü nte di muui a rá ji xtí hoga ma mbúihü, ne'bú dí numan'tho a rá Hogandãhi Ojã gue mí ẽna xtí huẽgahü. ³⁰Pe dí paĩmbü a ra Hmu gue bi ma: “Nugã ma 'befi ga ju't'i, ga un'na rá muui bi 'yøt'e.” Ne bi 'yẽn ra t'ohni: “Da zemba yú t'ũhni Ojã 'bú di thoqui da 'yøt' ra ts'oqui.” ³¹Emme nts'utho 'bú da dĩaba yú ts'oqui n'da a Ojã bú ja ran juãbi, gue'a i 'bú. ³²Pe dami bẽmhbü 'be'a gá 'yøthü u yu pa xu thogui, gue'bú ja gmí tĩmhbü ran nequi. Xun ho gá 'yøthü, jante tho gá hyãthü yun unbi xun ndoho. ³³Ne 'da ahü bi mba nthenni ahü, ne bi mba ma un'ni ahü bú ja yú hmi yu ja'i. Ne mi'da ahü gue hin gá suhü da mba ma un'ni ahü 'bú 'darbü gmí 'yohü u bi mba ma unbi. ³⁴Ne hin gán suhü gue gá zenguahü u ni cuhü 'bãpu ja ra fãdi, ne gán johya thohohü 'bú mí thãn'nahü 'be'a gmí pes'hü. Ne gá paĩmbü ja ahü bú mahẽts'i a man'da xun ho, gue da hyãt'i mazã. ³⁵O guí es'hü a gní hyuthü nzambü, janangu'e'a din 'da ahü n'da ran t'unni xun ndoho. ³⁶Pe i jatho ga sethü ts'u, n'dahma da zã ga øthü rá pähä Ojã, janangué ga hãmhbü a bi ma

majuãni di 'daju. ³⁷Nguetho i mam bú ja rá t'ohni Ojã:

Mi ts'utho ba ẽ'a i ja gue ba ẽhe, ya hin da ya'a ba ẽhe, ne di 'da ahü a guí tõmhbü.

³⁸Ne nu'u to da 'yẽc'yeyi majuãni gã, gue'u ga hocpa yú ts'oqui, ga embi xun ho búya, ne ga un'ndü ra temazã. Pe nu'u bi mbengui hin ga numanho u,

bi 'yẽn Ojã. ³⁹Pe nuju hinga gueju dá penju guepu xcã nuhü ran unbi mazã. Pe dí ẽc'yeyihü gue majuãni a Ojã, janangu'e'a din jaju ra temazã.

Ne gue'a ná ẽc'yeyihü majuãni a Ojã

11 'Be'a nam bõn'a na ẽc'yeyihü majuãni a Ojã. Nãm bõni, gue dí ẽc'yeyihü majuãni ga hãmhbü a ran ho bi xijü Ojã. Ne nam bõni ga ẽc'yeyihü majuãni 'be'a gãtho i ma Ojã, madague'bú hin dí nuhü a. ²Nu ma bombõtahü bi hnumanho nguetho bi 'yẽc'yeyi majuãni a Ojã. ³Dí ẽc'yeyihü majuãni bi 'yøt' Ojã yu ximhäi, madague'bú hin dá nuhü 'bú mí 'yøt'u. Nu'bú mí 'yẽna din ja, ya bin ja búya, gue bi 'yøt'e nangué u 'be'a him midí nequi. ⁴Nu'a ra Abel bi un Ojã n'da ra 'bøts'e xun ho xinda gue a bi un a ra Caín, nguetho bi 'yẽc'yeyi majuãni a bi xi Ojã. Nu'bú mí thãba a rán t'unni ra Abel, bi fãdi bi numanho Ojã a. Ne madague'bú bi du ra Abel, pe tengu 'bú 'bũtho, gue urcahü 'be'a mí øt'a, gue bi 'yẽc'yeyi majuãni a Ojã. ⁵Ngutho ra Enoc, bi 'yẽc'yeyi mbo rá mbüi a majuãni. Janangu'e'a bi ts'ixpu ja rá ngu Ojã ne him bi du. Ne him bi thĩngua ja ra häi a, nguetho bi zix'a Ojã. Ne i ẽn ra

t'ohni: “Nu'bu hin ní ts'its'i, bi hnumanho a.” ⁶Pe nu'bu i 'bu a n'da i nde da zøm bu 'bu Oja, pegue da 'yëc'yei majuañi i 'bu a, ne da 'yëc'yei majuañi din t'un ran ho a to i hon Oja. Nguetho hingui sä da numanho Oja n'da 'bu hingui ëc'yei a majuañi. ⁷Bi 'yëc'yei a ra Noé gue majuañi a mí xi Oja din ja a ra dambunt'i, madague'bu hin ní nu. Ne bi 'yõt'a ra dābarco bi xifi, guepu da yan'u i 'bupu rá ngu. Ne bi 'yëmbi xun ho Oja a nguetho mí ëc'yei mbo rá mbui a Oja. Ne gue'a í nequi hing yu 'yëc'yei gätho ra ximhäi, jan í ts'emba u. ⁸Bi 'yëc'yei majuañi Oja a ra Abraham. Janangue'a bi bøm 'bu mí zon'na Oja, gue da mba bu ja a ra häi bi xi Oja gue di unni. Bi nexpu ja rá häi zehë, ne him mí pañi hapu man ní mba. ⁹Ne nu'bu mí zøm bu, pe bin 'yotho bu. Nguetho bi 'yëc'yei majuañi gue ja nín zøm bu rá ngu Oja mahëts'i. Janangue'a bi hyötho yu ngum'bø't'e bu. Ne ngutho bi 'yõt'a ra Isaac rá ts'unt'u, ne a ra Jacob rá 'beto, gue ne'u da gomhbu ra herencia bi sih majuañi ra Abraham. ¹⁰Nguetho nu ra Abraham mí tøm'i da zøni nín zøm bu ja n'da ra dāhnini gue mahëts'i, din ja høn'bu go njam'bu, gue bi bøn Oja ne bi 'yøzehë. ¹¹Ne bi 'yëc'yei majuañi a ra Sara, ne gue'a í hyan rá ts'edi Oja a gue dim 'buh rá ts'unt'u. Ne him mí sä xtím 'buh rá t'uhni, gue ya xum bømbe. Pe bim 'bu'a rá ts'unt'u, nguetho bi bañi majuañi da 'yõt'a bi man Oja. ¹²Ne ngutho ra Abraham, madague'bu ya xí thoh yu pa gue mí sä xtím 'buh yú t'uhni, pegue bi zøni bim 'buh yúm bom'beto ëmme xun ngu, tengu yu

sø mahëts'i, o tengu yu 'bomu bu ja ra ndendeja, gue njongui hät'i da mbede. ¹³Ne gätho u bi du 'bu him mani hyan a ran ho bi xi Oja. Pe tengu'bu mí handi yatho bu bí ja a ran ho bi sifi, nguetho mí ëc'yei mbo yú mbui gue majuañi din t'unni. Janangue'a bin johya 'bu mí bñi gue da nu a. Jananjabu bi manse tengu'bu bi thotho ua ja ra ximhäi u. ¹⁴Ne nu u im ma tengu na, i udi gue i 'yotho ne i hon man'da ra häi guepu din zai. ¹⁵Ne nu'bu xtám benthó a ra häi bu xpí bøn u, mí sä xtá mbeng mahøn'a u 'bu. ¹⁶Pe mí nde n'da ra häi man'da xun ho, gue nde da ma, ra häi mahëts'i. Janangue'a bin johya Oja gue da 'yëmbi yú Oja u, ne bi hocpa yú hnini u. ¹⁷⁻¹⁸Ne nu'bu mí ts'äp rá mbui ra Abraham, gue bi sifi bá si a rá ts'unt'u ra Isaac, da mbøspa Oja. Ne mí nde xtá 'yøt'e, nguetho bi 'yëc'yei majuañi a Oja, madague'bu bi xifi dim 'buh yúm bom'beto 'bu bi xand ra Isaac. ¹⁹Gue'a bi bñn'a ra Abraham gue i ja rá ts'edi Oja da xox u xun du. Janangue'a tengutho 'bu bi dambñi bu 'bu u xun du a ra Isaac 'bu mam bá si mahøn'a a rá ta. Ne n'da ra hmëpya bi 'yøt' na. ²⁰Ne nangue a bi 'yëc'yei majuañi ra Isaac gue da gomhbu rán ho Oja u yú t'uhni, janangue bi sih majuañi ra Jacob ne ra Esaú gue da mba majapi. Ne bi sifi 'be'a bi zänba Oja n'da ngu n'da u. ²¹Ne ngutho a ra Jacob, bi 'yëc'yei majuañi a ran japi bi man Oja. Ne ní mba bu da du, pe bi thocpa a ran japi u yú 'beto, gue'u yú ts'unt'u ra José. Ne bi dānde Oja 'bu mí dospa rá yā rá tøhø a ra Jacob. ²²Ne a ra José bi 'yëc'yei majuañi a

bi man Oja. Janangue'a nu'bu mí ts'utho da du, bi xi u yú menguhue yu israel, gue da zoni da mbeng bu yú häi zehé. Ne bi xifi da thux'a ra ánima 'bu bi bóm bu u, gue'a ra José xí du. ²³Ne rá ta ne rá mbe ra Moisés 'bu mim 'buh ra Moisés, bi 'ya'a rá ts'unt'u an hyuzna. Ne him bi numansu a rán t'edi ra ts'ut'abi gue mí ma xtí tho u yú ts'unt'u yu israel. Nguetho midí nequi din hocja'i, ne mí ec'yei majuañi di jamansu Oja. ²⁴Ne a ra Moisés guexa'a mí ec'yei majuañi a Oja. Janangue'a nu'bu mín dan'yohu, him mam bi nde da t'embí rá ts'unt'u a rá t'ixu ra ts'ut'abi bu Egipto, gue xtán zä xtín jase rá ts'edi. Ne gue'a rá t'ixu a ra ts'ut'abi bi dím bu mán t'agui ne bi tede. ²⁵Pe man'da bi nde 'darbu bin unbahu u yú t'uhni Oja a ra Moisés nu'u yú menguhue, xinda gue'bu xtán den rán johya ra ximhäi gue ní mba bu da guadi. ²⁶Ne nu'bu mín 'yomfëni ra Moisés, man'da di muui 'bu n'dat'a yun ts'ante da nuui ra Cristo, xinda gue'bu xtí manda 'be'a gätho mí ja bu ra häi Egipto, nguetho man'da mí numanho 'be'a di un Oja m'bejua. ²⁷Ne nangué bi 'yec'yei majuañi ra Moisés, janangue'a bi bóm bu ra häi Egipto, ne him bi zu a nán cue a ra ts'ut'abi. Pe bi hyut'an zambui, nguetho bi badi in 'youi Oja, madague'bu him mí nu. ²⁸Pe bi 'yec'yei majuañi a bi xi Oja a ra Moisés, janangue'a bi 'yot'a bi xifi, ngue bi manda dí cots'i ra ji bu ja yú 'yojut'i yu israel. Janangue'a him bi thop yú mbadi ts'unt'u u yu israel 'bu mam bá gh rá m 'behni Oja. Gue'a t'embí ndq̄baxjua bi du'mi bi 'yot'u. ²⁹Bu

mí 'yec'yei mbo yú mbui i ja rá ts'edi a Oja u yu israel, janangue'a bi jap'a Oja bi xocpa n'da ra 'yu bu ja ra deja, gue bi tho u. Pe nu'bu mí 'yena ne u xtá 'dax'u yu me egipto, gue'u mí cute, bi comp' ra dehe bi du u buya. ³⁰Nu yu israel bi sifi di the'ts'a ra dahnini Jericó gätho nyoto pa, nguetho ma mbä't'i ra jado a ra hnini. Ne nu'a í 'yec'yei majuañi a Oja, ne gue'a í yot' ra jado a 'bu mí gua'a nyoto pa di the'ts'i. Ne bi zä bi dap ra hnini u yu israel buya. ³¹Pe mí 'bup n'da ra xisu gue ra Rahab. Ne madague'bu man ra 'yom't'eni mam'bet'o, pe hinga ne a bi tho a 'bu mí tho yú menguhue gue him mí ec'yei Oja. Ne nu'a í zimmanho u yúm 'behni yu israel, ne gue a í fadi mí ec'yei mbo rá mbui a Oja. ³²Ne xun ngu mi'da xtán zä xcá xi ahü, pe hinga xot'a yu ora ga xi ahü, nangué ra Gedeón ne ra Barac, ne nangué ra Sansón ne ra Jefté, ne nangué ra David ne ra Samuel, ne gätho mi'da yu pongahya. ³³Ne mí ec'yei majuañi Oja u, ne gue'a í hyan rá ts'edi Oja u, gue bi dap yu ja'i mí 'bup n'danni mi'da yu häi 'bu mín sühmbu. Ne bin ts'ut'abi xun ho. Ne mí ec'yei majuañi a bi sifi, janangue'a gätho bi zä bi 'yot buya. Ne nu'u mi'da mí ec'yei majuañi a Oja, janangue'a him bi za yu dazate. ³⁴Ne him bin zø u mi'da bí thotpu ja ra orno 'bu emme midí thoni nám pa, nguetho bi 'yec'yei a majuañi u. Ne him bi zä bi tho mi'da 'bu mí t'embí xtá tho nangué ra juai. Ne nu'bu mí güent yú ja'i u mi'da, bi jap'a Oja bi zaqui. Ne madague'bu him mí ja yú ts'edi u mi'da, pegue tengu'bu ya mí ja yú ts'edi 'bu mí 'yec'yei majuañi Oja, ne

gue'a í 'da u yu dofui yún suihu.

³⁵Ne mí 'bú i 'da yu xisu 'da'a n'danni, gue xí du yú t'uhni. Pe bi dambëni u yú t'uhni 'bú mí 'yëc'yëi majuani u yú mbe. Ne nu'u mi'da bi ndese bi tho nangu'e'a bi 'benza, ne him bi nde bi goh yú mbui guepü xtá mba ma thögue, nguetho bi 'yëc'yëi majuani da bõmanho bú ja ran ðate u, da mba bú ja ra te man'da xun ho. ³⁶Ne nu'a í 'yëc'yëi majuani u mi'da, ne gue'a í hyät' yun ucpi gue bi t'uspi, ne bi hyät' 'bú mí mím 'benza, ne'bu bi thu't'i 'da nangu'e yu cadena ne bi jot'a fädi.

³⁷Ne bi tho u 'da gue bi mba ma bat'ado. Ne nu'u mi'da bi thengui nde nangu'e ra thegui. Ne mi'da í tho ra juai 'bú mí sifi da mba ma thögue. Ne mí 'yotho u mi'da, ne í huëhi thoho u, mí he yu xide'yo, nguetho pa ma ucpi. Ne mí sä ran u gue mí pa ma unbi. Ne gätho u bi hyät'i, nguetho bi 'yëc'yëi majuani a Oja.

³⁸Ne him mí fädi gue man'da xun ho u, pe man'da di muui u xinda gue'u gätho ra ximhäi. Pe ha sä mí 'yotho bú ja yu uhäi 'bú mí 'dagui, nepü ja yu t'øhø. Ne mí 'bupü ja yu hyädo nepü ja yu hyähäi. ³⁹Pe gätho bi hnumanho u nangu'e bi 'yëc'yëi majuani Oja. Janangu'e'a i pa mfëni thoho u. Pe him 'bex bi hyän a bi xi a Oja di unni. ⁴⁰Nguetho xí zän Oja 'be'a man'da xun ho da 'yøt'e nangu'eju, gue 'darbu ní hamhbu ran ho u mí 'buh maya'bu.

**Thocpa thoho ga tenhdü a
ma ngurpihu ra Jesús**

12 Janangu'e'a nuju i 'bui xun ngu yu ja'i gue xu 'yurcahu a majuani Oja tengu ja dá xi ahü.

Janangu'e'a ga 'ueju ts'u gätho di pajü, ne yu ts'oqui gue tengu'bu an thu't'i ma guahu, n'dahma ga häthü dan tihmbü nangu'e'a ran täha bin 'daju guepü go him min sä. ²Ne thocpa thoho ga hanthü a ma ngurpihu ra Jesús, janangu'e'a da zä n'dat'a ga øthu büya. Ne di jaju ga øthu tengu bi 'yøzehe, gue bi 'yëc'yëi majuani a Oja, ne gue'a í hyät' ran unbi bú ja ra pont'i a. Ne nu'a ran ðate bi nu, yün ðate u yu ts'om'bäi, emme ma ucpi a. Pe him bi zu da nu a tengu a, nguetho mí paði din ja ran johya m'bejua nangu'eju. Ne nuya bí 'bupü mahëts'i 'darbu ní mandaui Oja. Ne guepü i sixcahu bú. ³Ne gam bëmhbu tengu bi 'yøt' ra Jesús, bi hyät' 'bú mí ts'ui, ne'bu bin unba bú 'buh yu ts'om'bäi. Janangu'e'a hin dan xømbuihu, ne hin gam bëmhbu gue ga penjü. ⁴Pe nu ahü hinga ná es'hu yu ts'oqui guepü gdí tuhü. Pe dami 'yes'hu u, madague'bu gdí tuhü 'da ahü. ⁵Ha gá pumbënihu a ran zofo gue i xijü Oja, gue yú t'uhni gahu a, tengu mam bú ja ra t'ohni bú i ñna:

Ma ts'unt'u i, dami bëni 'be'a dí mbep'a a ni Hmu, gue'bu bi xi i hapü gá 'bedi.

Ne xín gui säman'u 'bu bi zu i.

⁶Nu'a ra Hmu i xänba u di huëqui,
ne i fe u gätho u i ëmbi yú t'uhni.

⁷Dami hyäthü u yum fei, nguetho gue'u i xän'nahü u. Nu Oja i ñna yú t'uhni ahü. Ne jo'o n'da ra t'uhni gue hin da xänba rá ta nangu'e yum fei. ⁸Pe nu'bu hin da mbep'ahu Oja, tengu u gätho yú t'uhni i fei, nu'bu,

masque hin yá t'uhni ahú 'bú. Guín jahú tengu ra t'uhni gue hinga mfádi to'o rá ta. ⁹Ne man'da, nu'bu mín t'uhnihú, gue'bu mí mbegba ma tahú dám 'búhmbú ua ja ra hái, dá numansuhú ú. Hanja man'da hin dín umhbú da mbegbahú Ojá, rá Ta ma mbúihú, janangue ga t'ímhbú ra te ma mbúihú. ¹⁰Nu ma tahú ua ja ra ximhái bi mbegbahú 'bú n'dandj, gue mím bēni xún ho. Pe nu Ojá 'bú i fēgbahú, zai xún ho i ørchahú, gue di jajú xtán hothogahú tengu a. ¹¹Majuqani hin dí ģmhú xún ho a ram fei 'bú ra ora dí sáhu a, nguetho xún ú. Pe nu'bu bin hoh ma mbúihú nangue ram fei, ne dí 'búmanhohú búya, ne i hu ma mbúihú.

Nts'utho 'bú ga hehmbú rá nde Ojá

¹²⁻¹³Janangue'a dan ģhyahú mahón'a gue ga thoju a rá 'befi Ojá, ne hin ga 'uehmbú. Pe ga haxhú ra 'yu xún juani. Nubúya nu ni guahú guí hēmfú, mí ģna xtá 'uagui, pēgue da yāni, da hyá ra ts'edi mahón'a. ¹⁴Ne gui hyomhbú hin gui dūmhú n'da ra súi. Ne gui hyomhbú ra hogambú. Nguetho nu'a hin'yú ra hogambú hin da zā da nu a ra Hmu. ¹⁵Ne 'da gdám fáxta nin 'yomfēnihú n'da ngu n'da ahú, janangue'a hin dim 'bú i 'da ahú hin da nde rá mate Ojá. Ne xinga n'da ahú dín ja tengu n'da rá 'yú ra ts'oqui, gue hin di nequi 'bú rá mbúdi, pe nu'bu bi bōts'e din xāndi, di ts'on ú mi'da búya. ¹⁶Ne dam fāhmbú njon dan 'yomt'ēnihú. Ne xín ga samhú a rá mate Ojá, tengu bi 'yót' ra Esaú, gue í pá a ra túhú a rán japi mí ģna xtí un'na Ojá, gue

rá mbúdi ts'unt'u ra Isaac. ¹⁷Ne gui páhmbú 'be'a bi 'yót' ra Esaú, gue m'bejua bi nde a ran japi mí ģna xtí un'na rá ta. Pe him mam bi zā bi un'na. Ne ts'edi bin zoni, pe him bi dīni 'be'a xtá 'yót' mahón'a gue xtá hyān'a. ¹⁸Gam bēmhú 'be'a bi 'yót' yú israel, bi zóm bú ja n'da ra t'òhø ua ja ra ximhái, guepú bi de ra sibi nts'utho, ne bi 'bexui yú güi tengu 'bú ra xui, ne bin ja ra ndonthi 'bú mi sih yún t'edi Ojá ú. Pēgue n'da ra hmēpya a tengutho bú rá ngu Ojá gue ģmme xún dāxqui. ¹⁹Ne bi 'yòh ra thuxi, ne rá nde Ojá bi 'yò ú. Ne nu'bu mí 'yò a rá nde ú yú israel, ģmme bi 'yáh ra mate gue hin da 'yòh mahón'a, nguetho ģmme bin su. ²⁰Him mí hāt'i da 'yò a ra nde bi xifi, bi 'yēna: “Xinga n'da ra jā'i ne xing yú zu'uē da zā da dācua, nu'bu da dācua, 'bexque da tho, ne da mba ma 'ye'mado o gue da mba ma sūnza.” ²¹ģmme nts'utho 'be'a bin ja bú. Nese ra Moisés bi 'yēna: “Dí fet'i gue dín su.” ²²Pe nuju ya njuantho rá hnini Ojá bú mahęts'i dí cūthú, i papú ma mbúihú, gue Ojá zai 'bui. Ne i t'ēmbi ra t'òhø Sión a rá hnini Ojá, ne i t'ēmbi Jerusalén bú mahęts'i. Ne dá sómhbú bú 'buh yám 'behni Ojá mahęts'i gue yú mahuāhi thoho, guepú di munts'i i thānde Ojá ģmme di johya. ²³Ne dá cūthú bú an thuts'i ma thuhuhú bú mahęts'i, guepú dām petihú gātho to'o bi hyān ra herencia bi un Ojá. Ne dá cūthú bú bí 'bú Ojá ra Ze'mi di juānbi gātho. Ne pú 'buh yú mbui ú i tu, gue nu'ú bi t'ēmbi xún ho 'bú mí hoc'a Ojá. ²⁴Ne dá cūthú bú 'buh ra Jesús ma hocpatehú

bü bí 'bü a i ørcahu ran hoqui ma'da'yo. Ne dí cuthu nangué rá ji ra Jesús 'bü mí tho, í pungaçu Oja a. Janangué'a man'da xun ho i xijü rá ji 'bü mí tho, xinda gue'a rá ji ra Abel 'bü mí tho, nu'a i ma di unba a to bi hyo a. ²⁵Janangué'a i jatho dam fähmbü hin ga hehmbü a rá nde a in zoju ya. Gam bëmhbü him bi zä bi zo a ran unbi u bi mbesta a rá nde Oja, 'bü mí ts'ocua ja ra ximhäi. Janangué'a 'be xingui ts'u da zä ga sohmbü ran unbi 'bü ga festahu a Oja, nguetho mahets'i bü in zoju ya. ²⁶Nu'bü mí man yun t'edi Oja bü ja ra t'øhø, bi japi bi 'yan ra häi. Pe nuya i en Oja: "Man'dandj ga japi di 'yani, pe hinga høn ra häi, pe ne mahets'i," bi 'yæn Oja. ²⁷Ne nu'a 'be'a gätho hingui dü, da mba ma bünt'i. Ne din zam bü u hingui sä da mba ma 'ueque, gue nu'u 'be'a gätho bi zän Oja gue din zam bü. ²⁸Ne bin 'daju bü di manda Oja gue hingui sä da mba ma 'ueque. Janangué'a ga xihmbü jamadi Oja, ne ga thandehu ngue ga numansuhu ne ga suhu. Ne gue'a numanho a büya. ²⁹Nguetho nu ma Ojahu di juadi 'be'a hingui numanho tengu ra sibi.

Ga øthu a dí numanhoju Oja

13 O guí e'ts'a gnán hueju n'da ngu n'da ahü tengu'bu guidín cuhu. ²Ne guim bëmhbü gui säyabahü ja ni ngumhbü to'o da zøm bü. Ne nu'u 'da njabü mí øt'e, bi zin u 'da yúm 'behni Oja bá nexpø mahets'i ne him mí pädi. ³Ne dami bëmhbü u yu ofädi, ngue tengu'bü n'da gnan ofäditohü. Ne guim bëmhbü u bi mba ma

unbi, nguetho ne ahü i ja ni ja'ihü gue sä da mba ma un'ni ahü. ⁴Ne gätho ahü guin numansuhu a ran thäti gá 'yøthu ni xisuhu, ne a bi 'yøt'u mi'da. Ne gam 'bumanho nangué nin thätihü, njon di ts'on a. Nguetho di unba Oja u to'o da 'yøt' ran 'yomt'ëni, ne u hinga na din thäti, ne u xun thäti nu'bü i øt' ran 'yomt'ëni. ⁵Ne 'yo guí numanhohü xun ngu ra mbeti. Pe gan johyahu nangué hangu ts'u i ja ahü. Nguetho: "Njam'bü ga hec'ahü, thocpa thoho ga jamansu ahü," bi 'yæn Oja. ⁶Janangué'a sä dan johyahu 'bü dí emhbü:

I fäxcahu ra Hmu,
ne hin ga suhu 'be'a da zä da
'yørcahu yu ja'i.

⁷Dami bëmhbü 'be'a bi 'yøt'u yu ngurpi gue bi xi ahü räm hman Oja. Ne guim bëmhbü 'be'a bi böni nangué ra te man nám 'bü u. Ne gui thøjü a bi 'yut'ahü, nangué bi 'ygc'yei majuañi a Oja u. ⁸Nu ra Jesucristo hingui dim pädi, gue'bü go maya'bü, nehya ne gätho yu pa høn'bü go njam'bü. ⁹Janangué'a hin gan hyehmbü da ts'ix ahü bü ma'ueni, guerpü i hman yum hma 'dahma 'dan'yo ne hingam fädi. Pe nu'a ná bëmhbü rá mate Oja gue'a ní zac ma mbuihü a, xinda gue'u yun t'edi gue 'be'a i ts'i. Nguetho njo'o to'o xí zac yú mbui 'bü supi 'bü ja a i si. ¹⁰Pegue i jajü n'da ran ts'ihme, tengu ra hmepya gue ra 'bøts'e mí øt' yu mbäjä bü ja ra nijä maya'bü, him mí ja ran t'edi da zi. ¹¹Pe nu rá hmumbäjä yu israel 'bü mí mbøspa Oja nangué yu ts'oqui, bi dexpø mbo a rá ji u yu zu'uë, guerpü ja ra cuarto man'da xun

daxqui. Pe nu yú ngø u yu zu'uę mí zø bũ ndehnini. ¹²Ne gue'a bi 'yøt' ra Jesús, bin unbi bi du bũ ndehnini bũ 'bũh yu israel. Ne gue'a rá jise í hoc yu ja'i. ¹³Pe ga mbähä ga tenhdũ bũ ndehnini bũ 'bũh ra Jesús, tengu'bu n'da na 'bengadahũ bũ ma'ueni. ¹⁴Nguetho nuua ja ra ximhäi hin'yũ ua n'da ma hninihũ gue din zaí xũn ho. Pe dí homhbũ ra dahñini gue njam'bu da gua a, guepũ nín zamhbũ bũ. ¹⁵Ne nde'bu thocpa thoho ga thãndehũ Oja nangue ma ndehũ, ne ga xihmbũ ra jamadi. Ne di thoc'a mam hmamhbũ a ra Jesucristo, tengu'bu di un Oja ma 'bøts'ehũ. ¹⁶Ne hin dam pumbenihũ a na øthũ ran ho, ne hin dam pumbenihũ ga comhbũ 'be'a jajũ, nguetho ne'ũ tengu'bu yu 'bøts'e i numanho Oja u. ¹⁷Ne gui 'yøthũ a xi a ni ngurpihũ, ne gui pañmbũ ja yún t'ędi da xi ahũ 'be'a gui 'yøthũ. Nguetho i fät'a ni mbũihũ u, ne i jatho di dãp Oja ra güenda nangue ahũ. Gui 'yøthũ a dán johya ni ngurpihũ, ne hin da du yú mbũi. Nguetho nu'bu hin gui 'yøthũ a, xín da bømanho ahũ 'bũ. ¹⁸Yäfu rá m fäts'i Oja nanguecãhe, nguetho n'dat'a dí m bẽmhbe ga

tenhde a, ne dí nde ga øthe xũn ho gãtho. ¹⁹Dí ä ahũ ra mate, gue ęmme gui 'yäfu Oja di jaqui ga mbagã bũ n'dihi.

I äp rán japi Oja u yú cu

²⁰Nu Oja ra hocpate a, bi xoxpũ 'bũ u xũn du a ma Hmuhũ ra Jesucristo, nu'a di jamansuc ma mbũihũ. Ne nu'a rá ji í hoc'a ran hoqui njam'bu da guadi. ²¹Ne dí äp rá mate Oja da 'yøt'ahũ hin hapũ gui 'behmbũ, n'dahma da zã gui 'yøthũ rá pähä a. Ne dí äp rá mate da 'yøcahũ 'be'a gãtho i nde a rá ts'edi ra Jesucristo. Ga numansuhũ Oja gãtho yu pa mazãi. Ne hønt'a gam bẽmhũ a. ²²Ma zi cu ahũ, dí ä ahũ ra mate hin gan xømbũihũ gui 'yøhmbũ na ran zofo, nguetho nuna ram hma dá ot'ahũ hingui ngu 'be'a ma. ²³Ja n'da ram hma dí nde ga xi ahũ, nu'a man 'yohũhũ ra Timoteo ya bi so'ts'i. Nu'bu da zøcua n'dihi, ga six 'bũ dá mba bũ. ²⁴Zenguagahũ ts'ũ bũ gãtho ni ngurpihũ, ne gãtho u yu cu gue ma mi'yęc'yehũ. Nehya bá nexpũ Italia i pen'nahũ ran zengua. ²⁵Ne dí äp rán japi Oja nangue gãtho ahũ. Ne hønt'a dí xi ahũ ya.